

【河壩水故鄉情】彭歲玲原作

還細時節，佢戴在苗栗山肚，該位一山過一山，山山有坑水，該兜河壩水係佢兜生活盡重要个俛憑，做得抽水蔭田、揸水淋菜、河壩洗衫，對佢來講，童年回憶就像河壩水，流流流流永不斷。

河壩脣景色實在當靚，尤其係逐年五月天油桐開花个時節，白到滿山滿坪。河壩脣還有一種雪白个野薑花，有種特別个親切、自然，花香分人鬆爽，佢時常摘轉去屋下欣賞，有一種感動、幸福个感覺。

佢係最滿个妹仔，兄弟姐妹歲數差當多，所以盡黏阿姆，還記得，阿姆逐日朝晨頭一定會揸等菜籃去河壩洗衫，河壩水鮮見底，洗衫時節腳放水肚，水肚个溜苔、魚仔、蝦公，時常會爬到腳邊爪痞¹，該感覺當像來撩你、尋你搞樣，想愛用手去捉又捉毋著。撈蝦公搞，會暢到毋知好轉，所以，佢盡好去河壩洗衫，洗越久越好。

阿姆在山排開畝仔做菜園，去河壩揸水蹶崎上菜園係逐日个事頭，佢乜想愛搵手，就學阿姆揸水上大崎，毋過，一擔水晃晃激激揸到菜園伸無一半，阿姆看佢恁煞猛，笑笑仔講：「揸少無相干！」

做事情毋好半桶水就好！」阿姆个話，影響佢盡大。

阿姆煞猛種菜合畜頭牲，三餐飯菜從來斯毋使買。連佢兜細人仔搞到肚屎枵，菜園肚个笋瓜仔隨手摘來食，就係止枵最好个零嗒。

佢兜最愛用阿爸做个笱仔²捉蝦公，裡肚放等攪飼料个香飯糰，蝦公鼻著就會爬落去，笱仔落得出毋得，斯有一笱仔蝦公。笱仔差毋多隔 50 公尺放一隻，用石頭砵等，第二日再過來收。毋過，成時毋堵好會收到隔壁鄰舍个，所以，愛注意，係無你就愛撈煮好个蝦公兜一盤去撈人會失禮囉！

河壩水成時乜會像發閘樣，堵到風搓天喊頭大水，河壩淦盆淦鉢無法度行兼。該河壩係佢兜去學校讀書一定愛經過个路，平常時一隻一隻石頭排列个石跳仔就係橋，毋過，風搓天做大水，水淦到麼个都看毋著，放學時節，一定會看著莊肚个阿叔阿伯，在對面等愛渡細人仔過河壩，大人細子手牽手度過危險。這河壩水帶分佢兜个考驗，乜分佢兜體會著大人惜細子个情懷，永生難忘。

月係故鄉圓，水係故鄉情，流無停个河壩水係醃醃³个鄉情，這份情係佢這生人最珍貴个寶。

¹ 爪痞：音 zau' hoi；抓癢。

² 笱仔：音 ho er；捕蝦簍、捕蟹簍。

³ 醃醃：音 neu neu；濃稠。